

## Molina di biento

© Quito Nicolaas

Mainta ta lanta  
un aire sereno ta baila  
rib'e casnan di cunucu  
anunciando su dia.

Yegando di aleu  
rib'e Plaza di pregunta  
un otro aña di alegria  
tapando mi cara na luto.

Camindanan yena di  
speranza  
di un dia, si un dia  
di construi e conciencia  
pa ta mas cu 'n sombra.

Molina di biento  
sembra mi palabranan  
penetra entre simianan  
unda un bos a nace.

Cu man'nan na cielo  
no bira lomba ni cara  
p'e criaturanan sunu  
maske falta 'n contesta.

## Anhelos

Mi kier bolbe mira e "Arubiano",  
Esun cu mi a lanta conoce  
E homber trahado di su cunucu  
E macho cu ya ta disparce.

Mi kier tende grito di bacanan  
Di cabrito y carnenan den cura  
Y canto di gai manera bon tempran  
Cu ta avisa bo cu ta amanece

Pa mi lanta bay den sabana  
Tende grito di pachi su compaño  
Ta grita e toro cora "Caporal"  
Hooiii Caporal Hooiii

Ta e, ta e toro cora cu ta dirigi  
Bao di grito di su capitan  
Cu apenas bo ta mire den e scuridad  
Pero cu conoce Caporal su calidad.

Bo por mira tur fogonnan na huma  
Y saborea e aroma di coffi mula  
Mientras cu otronan den cura  
Sint riba caya ta ordena.